

陰符經解

陰符經解

古十一家註

明

陳繼儒

高承埏

校

黃帝陰符經註序

所謂命者性也性能命通故聖人尊之以天命  
愚其人而智其聖故曰天機張而不死地機弛  
而不生觀乎陰符造化在乎手生死在乎人故

聖人藏之于心所以陶甄天地聚散天下而不見其跡者天機也故黃帝得之以登天下湯武得之以王天下五霸得之以統諸侯夫臣易而主難不可以輕用太公九十非不遇蓋審其主焉若使哲士執而用之立石爲主刻木爲君亦可以享天下夫臣盡其心而主反怖有之不亦難乎嗚呼无賢君則義士自死而不仕莫若散志巖石以養其命待生于泰階世人以夫子爲

不遇以秦儀爲得時不然志在立宇宙安能馳  
心下走哉丈夫所恥嗚呼後世英哲審而用之  
范蠡重而長文種輕而亡豈不爲泄天机天机  
泄者沉三劫宜然故聖人藏諸名山傳之同好  
隱之金匱恐小人竊而弄之

上篇

觀天之道執天之行盡矣故天有五賊見之者

昌

太公曰其一賊命其次賊物其次賊時其次  
賊功其次賊神賊命以消天下用之以味賊  
物以一急天下用之以利賊時以一信天下  
用之以反賊功以一恩天下用之以怨賊神  
以一驗天下用之以小大鬼谷子曰天之五  
賊莫若賊神此大而彼小以小而取大天地  
莫之能神而況于人乎筌曰黃帝得賊命之  
机自日上昇殿周得賊神之驗以小滅大管

仲得賊時之信九合諸侯范蠡得賊物之急  
而霸南越張良得賊功之恩而敗強楚  
五賊在心施行於天宇宙在乎手萬化生乎身  
太公曰聖人謂之五賊天下謂之五德人食  
五味而生食五味而死无有怨而棄之者也  
心之所味也亦然鬼谷子曰賊命可以長生  
不死黃帝以少女精炁感之時物亦然且經  
冬之草覆之而不死露之卽見傷草木植性

尚猶如此況人萬物之靈其機則少女以時廣成子曰以爲積火焚五毒五毒卽五味五味盡可以長生也筌曰人因五味而生五味而死五味各有所主順之則相生逆之則相勝久之則積炁薰蒸人腐五臟殆至滅亡後人所以不能終其天年者以其生生之厚矣是以至道淡然胎息无味神仙之術百數其要在抱一守中少女之術百數其要在還精

採炁金丹之術百數其要在神水華池治國  
之術百數其要在清淨自化用兵之術百數  
其要在奇正權謀此五事者卷之藏于心隱  
于神施之彌于天給於地宇宙瞬息可在人  
之手萬物榮枯可生人之身黃帝得之先固  
三宮後治萬國鼎成而馭龍上昇於天也  
天性人也人心機也立天之道以定人也  
亮曰以爲立天定人其在于五賊

天發殺機龍蛇起陸人發殺機天地反覆

范曰昔伊尹佐殷發天殺之機克夏之命盡而事應之故有東征西夷怨南征北狄怨太公曰不耕三年大旱不鑿十年地壞殺人過萬大風暴起亮曰按楚殺漢兵數萬大風杳冥晝晦有若天地反覆

天人合發萬變定基

良曰從此一信而萬信生故爲萬變定基矣

筌曰大荒大亂兵水旱蝗是天殺機也虞舜  
陶甄夏禹拯骸殷繫夏臺周囚羑里漢祖亭  
長魏武乞丐俱非王者之位乘天殺之機也  
起陸而帝君子在野小人在位權臣擅威百  
姓思亂人殺機也成湯放桀周武伐紂項籍  
斬羸嬰魏廢劉協是乘人殺之機也覆貴爲  
賤反賤爲貴有若天地反覆天人之機合發  
成敗之理宜然萬變平化聖人因之而定基

業也

性有巧拙可以伏藏

良曰聖人見其巧拙彼此不利者其計在心  
彼此利者聖哲英雄道焉況用兵之務哉筌  
曰中慾不出謂之啓外邪不入謂之閉內啓  
是其機也難知如陰不動如山巧拙之性使  
人无間而得窺也

九竅之邪在乎三要可以動靜

太公曰三要者耳目口也耳可鑿而塞目可  
穿而眩口可利而訥興師動衆萬夫莫議其  
奇在三者或可動或可靜之筌曰兩葉掩目  
不見泰山雙豆塞耳不聞雷霆一椒掠舌不  
能立言九竅皆邪不足以察机變其在三者  
神心志也機動未朕神以隨之机兆將成心  
以圖之机發事行志以斷之其機動也與陽  
同其波五嶽不能鎮其隅四瀆不能界其維

其机靜也與陰同其德智士不能運其榮深  
聞不能竅其謀天地不能奪其時而況于人  
乎

火生于木禍發必尅奸生于國時動必潰知之  
修鍊謂之聖人

筌曰火生于木火發而木焚奸生于國奸而成  
國滅木中藏火火始于无形國中藏奸奸始  
于无象非至聖不能修身鍊行使奸火之不

發夫國有无軍之兵无災之禍矣以箕子逃而縛羣牧商容囚而蹇叔哭

中篇

天生天殺道之理也

良曰機出乎心如天之生如天之殺則生者自謂得其生死者自謂得其死

天地萬物之盜萬物人之盜人萬物之盜三盜  
況宜三才既安

鬼谷子曰三盜者彼此不覺知但謂之神明此三者況車馬金帛棄之可以傾河填海移山覆地非命而動然後應之筌曰天地與萬物生成盜萬物以衰老萬物與人之服御盜人以驕奢人與萬物之上器盜萬物以毀敗皆自然而往三盜各得其宜三才適安其任故曰食其時百骸理動其機萬化安

鬼谷子曰不欲令後代人君廣歛珍寶委積

金帛若能棄之雖傾河填海未足難也食者  
所以治百骸失其時而百骸動者所以安萬  
物失其机而傷萬物故曰時之至間不容瞬  
息先之則太過後之則不及是以賢者守時  
不肖者守命也

人知其神之神不知不神之所以神也  
筌曰人皆有聖人不貴聖人之愚既覩其聖  
又察其愚復覩其聖故書曰專用聰明則事

不成專用晦昧則事皆悖一明一晦衆之所  
載伊尹酒保太公屠牛管仲作革百里奚賣  
粥當衰亂之時人皆謂之不神及乎逢成湯  
遭文王遇齊桓值秦穆道濟生靈功格宇宙  
人皆謂之至神

日月有數大小有定聖功生焉神明出焉  
鬼谷子曰後代伏思之則明天地不足貴而  
況于人乎筌曰一歲三百六十五日日之有

數月次十二以積閏大小餘分有定皆稟糖  
炁自有不爲聖功神明而生聖功神明亦玄  
精炁自有不爲日月而生是故成不貴乎天  
地敗不怨乎陰陽

其盜機也天下莫能見莫能知君子得之固鴻  
小人得之輕命

諸葛亮曰夫子太公豈不賢于孫吳韓白所  
以君子小人異之四子之勇至于殺身固不

得其主而見殺矣筌曰季主凌夷天下莫見凌夷之機而莫能知凌夷之源霸王開國之機而莫能知開國之機而莫能知開國之源君子得其機應天順人乃固其躬小人得其機煩兵黷武乃輕其命易曰君子見機而作不俟終日又曰知機其神乎機者易見而難知見近知遠

下篇

瞽者善聽聾者善視絕利一源用師十倍三反  
晝夜用師萬倍

尹曰思之精所以盡其微良曰後代伏思之  
耳目之利絕其一源筌曰人之耳目皆分于  
心而竟于神心分則机不精神竟則机不微  
是以師曠薰目而聰耳離朱漆耳而明目任  
一源之利而反用師于心舉事發机十全成  
也退思三反經書歷夜思而後行舉事發机

萬全成也太公曰目動而心應之見可則行  
見否則止

心生于物死于物机在於目

筌曰爲天下机者莫近乎心目心能發目目  
能見机秦始皇東遊會稽項羽目見其机心  
生于物謂項良曰彼可取而伐之晉畢至  
於淮淝苻堅曰見其机心死于物謂苻融曰  
彼勍敵也胡爲少耶則知生死之心在乎物

成敗之機見于目焉

天之无恩而大恩生迅雷烈風莫不蠢然  
良曰熙熙哉太公曰誠懼致福筌曰天心无  
恩萬物有心歸恩于天老子曰天地不仁以  
萬物爲芻狗聖人不仁以百姓爲芻狗是以  
施而不求其報生而不有其功及至迅雷烈  
風威遠而懼迩萬物蠢然而懷懼天无威而  
懼萬物萬物有懼而歸威于天聖人行賞也

无恩于有功行伐也无威于有罪故賞罰自立于上威恩自行于下也

至樂性餘至靜性廉

良曰夫机在于是也筌曰樂則奢餘靜則貞廉性餘則神濁性廉則神清神者智之泉神清則智明智者心之府智公則心平人莫鑒于流水而鑒于澄水以其清且平神清意平乃能形物之情夫聖人者不淫于至樂不安

于至靜能棲神靜樂之間謂之守中如此施利不能誘嚴色不能蕩辯士不能說智者不能動勇者不能懼見禍于重開之外慮患于杳冥之內天且不違而况于兵之詭道者藏天之至私用之至公

君曰治極微良曰其机善雖不令天下而行之天下所不能知天下所不能違筌曰天道曲成萬物而不遺椿菌鵬鶠巨細脩短各得

其所至私也雲行雨施雷霜霓生殺之均  
至公也聖人則天法地養萬民察勞苦至私  
也行正令施法象至公也孫武曰視卒如愛  
子可以俱死視卒如嬰兒可與之赴深溪愛  
而不能令譬若驕子是故令之以文齊之武  
禽之制在无

太公曰豈以小大而相制哉尹曰无者天之  
机筌曰玄龜食鱗鷁隼擊鵠黃腰啖虎飛鼠

斷猿蜍蛭齊魚狼犧噉鶴餘甘柔金河車服  
之无窮化玉雄黃變鐵有不灰之木浮水之  
石夫禽獸木石得其炁尚能以小制大況英  
雄得其炁而不能淨寰海而御宇宙也

生者死之根死者生之根恩生于害害生于恩  
太公曰損已者物愛之厚已者物薄之筌曰  
謀生者必先死而後生習死者必先生而後  
死鶻冠子曰不死不生不斷不成孫武曰投

之死地而後生致之亡地而後存吳起曰兵戰之場立屍之地必死則生幸生則死恩者害之源害者恩之源吳樹恩于越而害生周立害于殷而恩生死之與生也恩之與害相反糾纏也

愚人以天地文理聖我以時物文理哲

太公曰觀鳥獸之時察萬物之變筮曰景星見黃龍下翔鳳至醴泉出嘉穀生河不滿溢

海不揚波日月薄蝕五星失行四時相錯晝  
冥宵光山崩川涸冬雷夏霜愚人以此天地  
文理爲理亂之机文思安安光被四表克明  
俊德以親九族六府三事无相奪倫百穀用  
成兆民用康昏主邪臣法令不一重賦苛政  
上下相蒙懿戚貴臣驕奢淫縱酣酒嗜音峻  
宇雕牆百姓流亡思亂怨上我以此時物  
理爲理亂之机也

人以愚虞聖我以不愚虞聖人以奇期聖我以  
不奇期聖

筌曰賢哲之心深妙難測由巢之跡人或窺  
之至于應变无方自机轉而不窮之智人豈  
虞之以跡度心乃爲愚者也

故曰沉水入火自取滅亡

良曰理人自死理軍亡兵无死則无不死无  
生則無不生故知乎死生國家安寧

自然之道靜故天地萬物生

尹曰靜之至不知所以生

天地之道浸故陰陽勝

良曰天地之道浸微而推勝之

陰陽相推而變化順矣

良曰陰陽相推激至於變化在於目

是故聖人知自然之道不可違因而制之

良曰大人見之爲自然英哲見之爲制愚者

見之爲化尹曰知自然之道萬物不能違故  
利而行之

至靜之道德曆所不能契

良曰觀鳥獸之時察萬物之變鳥獸至淨律  
曆所不能契從而機之

爰有奇器是生萬象八卦甲子神机鬼鑿  
良曰六癸爲天藏可以伏藏也

陰陽相勝之術昭昭乎進乎象矣

亮曰奇器者聖智也天垂象聖人則之推甲子畫八卦考蓍龜稽律曆則鬼神之情陰陽之理昭著乎象无不盡矣亮曰八卦之象申而用之六十甲子轉而用之神出鬼入萬明一矣良曰萬生萬象者心也合藏陰陽之術日月之數昭昭乎在人心矣廣成子曰甲子合陽九之數也卦象出師衆之法出師以律動合鬼神順天應時而用鬼神之道也

陰符經解終

右陰符經三篇自漢書藝文志道家兵書俱不載  
隋志始載有太公陰符鈐錄一卷周書陰符九卷  
而不言經唐志乃有集注陰符經一卷爲太公范  
蠡鬼谷子張良諸葛亮李淳風李筌李治李鑒李  
銘陽晟十一家注又有驪山母傳陰符元義一卷  
汪云筌於嵩山虎口巖石壁得黃帝陰符本題云  
魏道士寇謙之傳諸名山筌至驪山老母傳其說  
黃山谷云陰符出於李筌熟讀其文知非黃帝書  
也蓋雜以兵家語又妄說太公范蠡鬼谷張良諸

葛亮訓注尤可笑惜不經柳子厚一掊擊也謨按  
史記蘇秦得周書陰符伏而讀之索隱引戰國策  
謂得太公陰符之謀則陰符是太公兵法以爲黃  
帝書固繆但如山谷謂出李筌恐亦未然此書宗  
旨與大易老子同歸而易言龍戰于野其血元黃  
老言聖人不死大盜不止亦奇險語安得以書中  
天發殺機龍蛇起陸天地萬物之盜等語遂目爲  
詭誕不經乎先秦古書類多後人依託安得一一  
舉而掊擊之乎通考道家兵書亦復削而不載固

矣哉汝上王謨識

